


G. VII. 10/a.2.





IO: BAPTISTAE TARASCONI Sac.

HODCEPORICON CHOLERAE INDICAE

a mense augusto an. 1817 ad martium exeuntem an. 1832



- Qua Ganges centum dextrorsum praefluit urbes,
Et centum biseros agros secundat arena,
Exitiosa lues, quam prisci nomine Graii
Dixerunt Choleran, indos transmittere fines
5 Nescia, ut unda maris nativum nescia litus,
Aeternum tamquam propriis saevibat in oris
Aeterno caeli vitio: at nunc primitus exit
Jussa foras; neque enim superi sine numine Regis
Supplicia insuetis culpis insueta parantis,
10 Rumperet obiectas tanto post tempora metas.
Hinc Pavor, hinc Letum et Luctus comitantur euntem.
Non avium errabunda cohors, aut saeva ferarum
Semina, nec pelagi proles, ex omnibus una
Gens hominum appetitur, divini causa furoris.
15 Principio languent vires, gravitate laborat
Vel vacuus stomachus, vertigine tempora, nervi
Spasmo, oculi nebulis, crebrisque sonoribus aures:
Intestina tument, crepitum dant, spiritus aegro
Singulta attractus; fauces premit angor obesas.
20 Nil medicinae valuere artes; violentia raptum
Immansueta mali crudescit. Viscera diris
Morsibus; os vomitu, simul exerceat alvus
Proluvie crebra, ingenti; ceu corpus utrinque
In saniem omne iret, gluten quae ductile tactu,
25 Aspectu cinerem simulat. Tremor occupat artus,
Extremaeque rigent rugoso frigore partes;
At fibrae introrsum rapido torrentur ab igne;

- Os inhiat, nulloque sitis restinguitur haustu.
 Nec satis: infandus miseros dolor acrius urit,
 30 Non secus ac rostro mordaci pectora vultur,
 Aut trahat ore canis, contractaque crura lacertosque
 Arripiat forceps: magno molimine versant,
 Seque in membra plicant; veluti sibi redditus anguis,
 Seminecem media quem pastor liquit arena.
 35 Si necopina quies longo subiisse labori,
 Omneque cum leto visum certamen abesse;
 At sudoris eat membratim frigidus humor,
 Pes, manus et vultus maculis varientur obortis;
 Heu, male tum quisquam propius spectare dolorum
 40 Crediderit finem, portumque salutis apertum.
 Nam magis atque magis furtim praecordia carpsit
 Pernicies victrix, fessosque exinde per artus,
 Perque omnes regnans concreto sanguine venas,
 Multa reluctantes elisit corpore vires:
 45 Non oculos visum, aut aures vox ulla lacessit,
 Vita fugit, tacitae subeunt vestigia mortis.
 Jam Sundam peregrina lues, semperque virentes
 Maniolas, priscisque incognita regna, Molucas
 Continuo invasit; posthinc mirabile vallum,
 50 Quod regno posuere suo, ardua mœnia, Sinae,
 Exsuperat. Crudeli absomit funere late
 Quot populos, Aurora, tuum complectitur aequor,
 Et quot alit tellus nullo circumfusa ponto.
 Heu caeli ignarae mentes! quid monstra Deorum
 55 Mendaci fabricata manu, et simulacra ferarum,
 Quis miseros ludit varia sub imagine daemon,
 Vana superstitio placat? Quid compita circum
 Longis ire juvat pompis? Quid sacra novatis
 Barbara, et humanae vitae mactantur ad aras?
 60 Vota precesque Deo tandem convertite vero;
 Ipse dabit veniam, neque poenas proferet ultra.
 Nec minus in Boream pestis contendit et Austrum;

- Ac neque eam medii maris aequora foeta procellis
 Tractibus immensis, nec inhospita tesqua morantur
 65 Ignibus aut glacie; non qui se vertice tollunt
 Nubifero montes. Tenuit velocior Euro
 Quas Bactri exercent, quas Persae vomere terras,
 Quas Erythraea marisque hyrcana binominis unda
 Humectat; tumido pingues qua flumine arenas
 70 Nilus, qua pingues Euphrates aemulus infert.
- Non tot prima solent autumnus frigora frondes,
 Nec metere agricolae, fervens ubi canduit aestas,
 Auricomae segetis spicas, quot corpora dirus
 Per Scythiam morbus, septemque sub axe trionis.
 75 Morti turmatim, nullo discrimine sexus,
 Ordinis, aetatis, dantur. Viduata colonis
 Arva, casae squallent, pecudes armentaque languent
 Impasta, aut mixtim nullo custode vagantur,
 Qua potus trahit et gramen. Sed plaga frequentes
 80 Percellit gravior cives, faciemque superbis
 Urbibus immutat: subit omnia luctus et horror:
 Limina clausa, viae clamore ac mercibus orbae.
- Nam cum morte furit, cumulumque laboribus addit
 Suspicio, monstrum, quo non praesentius ullum
 85 Attonitos agitare animos, et subdere caecos
 Pectoribus stimulos, miserosque creare timores.
 Hanc, simul incaluit primum madefacta cruore
 Humano, genuit tollus, jussitque vaganti
 Ultricem sceleris, caedisque instare Caino.
- Jam vero invasit cives, gelidumque medullis
 90 Inspirat virus, mentesque pavoribus implet.
 Tuta, intuta pavent; miserum! se credere nulli
 Audentes, sociae dirimunt commercia vitae.
- Quos coepit morbus, solo ceu littore quondam
 95 Naufragus exspirans, languent longumque gementes
 Qui det opem implorant, supremamque munera mortis.
 Frustra. Singultus non audit amicus amici;

- Vir non uxori, non uxor fida marito,
 Nec pietas natis, nec cura parentibus ulla.
- 100 Pars tectis secreta latent; pars moenia raptim,
 Non secus atque hostis capta si barbarus urbe,
 Aut furerent flammæ per templa domosque volutæ,
 Effugiunt, in aperta volant, loca sola, suosque
 Inque salutatæ mediæque in morte relinquunt.
- 105 Non, non ista patent spectacula barbara rerum
 Format ubi pietate animos, mollitque feroces
 Religio Christi. Cura illic mutua præsto,
 Illic sunt lacrimæ, sua sunt solatia poenis.
 Ante omnes varius gentis leuitidis ordo,
- 110 Quo gemitus vel signa vocant, occurrere gaudent
 Non timidi pro fratre mori. Te, Christe, sequuntur
 Sanguinis et vitæ pro vita prodige nostra.
 Nunc medicos latices, et nunc fomenta ministrant,
 Omnimodisque levant qua possunt parte, labores;
- 115 Qua non posse datur, suadent superare ferendo.
 Atque ubi nulla salus, vincitque potentia morbi,
 Ut propius capitis subeunt discrimina! ut ægros
 Alloquio in poenas firmant, pulsoque timore,
 Inspirant animis vitæ cælestis amorem!
- 120 Huc oculos, fratres, huc omnem flectito mentem:
 En Christi, aspiciat, en Christi patientis imago.
 In cruce jam toto laceratus corpore pendet;
 Palmas atque pedes ferro trajectus, et ipsum
 Consortis cerebrum spinis (eheu dolor, eheu!)
- 125 Transfixus languet, vitæque extrema relinquit.
 Nos, nos; ille quidem potuit nil tale mereri.
 Dulce pati, Christo patiente, iuvanteque Christo.
 Ipse animos viresque addit: timor omnis abesto
 Quas fortis poenas, fortis patientia lucro
- 130 Apponat, placideque luat quas debita culpis
 Supplicia, ut sceleris puros et abire paratos
 Advocet Omnipotens tandem Pater. En erit unquam

- Hora, peregrinae functos quae munere vitae
 Aethoria sistat patria, superumque beatis
 135 Coetibus adjungat? Mariam quae noscere matrem
 Unumque trinumque Deum sine nube tueri,
 Aeternumque frui post tot discrimina donet?
 His recreata modis nil mens mortale revolvit:
 Nec jam se queritur plecti, solvique recusat;
 140 Sed magis ire foras, nodosque erumpere gestit
 Corporis impatiens: qualis, quibus incidit, aetras
 Corva plagas, aut acer equus retinacula, notae
 Quum cecinere tubae, et certaminis hausit amorem.
 Tantum religio juvat ipso in limine mortis!
 145 Quid nova moliris, quidve audes credula Gallis
 Varsavia infelix! Geminas, viden' ipsa lacessis
 Cladis inauditae causas, dominumque potentem,
 Quique comes graditur quovis violentior hoste
 Armorum domitor, monstrum insuperabile, morbum.
 150 Horruit aspectu instantis discriminis ictus
 Pannonius, belloque asperrimus accola silvae
 Hercyniae: toto pater ipse exterritus anne
 Danubius, simul et contractis cornibus Albis.
 Frustra Germani venientem avertere tentant
 155 Contagem, finesque omni defendere opum vi.
 At tibi securae quis, magna Lutetia, terror,
 Quum regina ex urbe britannide, fulminis instar
 Quae media occurrunt parcentis tangere, lapsam
 Ante expectatum sensisti in viscera pestem?
 160 Jamque malum Ausoniae pulsat confinia. Frustra
 Nos mare, nos alpes, nos muniit Apenninus.
 Communem poscunt communia crimina poenam.
 Quem latet ira Dei? dubiis num prodita signis?
 Non alias variante dies ferrugine plures
 165 Sol tulit, aut toties serae sub tempora noctis
 Cardine ab occiduo lugubre ignescere longos
 Sanguineae lucis tractus, obitumque diei

- Vidimus ambiguum. Quoties jam funditus urbes
 Contremuere, simul ruere omnia visa profundum
 170 In barathrum, rerumque sequi commune sepulcrum?
 Quin etiam lacrimata ferunt simulacra per aras,
 Et volvisse oculorum orbes, et sancta virorum
 Corpora, quae templis servata et honoribus aucta
 Adsunt supplicibus, vivo manasse cruore.
- 175 Num genti interea mortali audacia cessit
 Irritare super, culpisque lacessere Numen?
 Per fas, perque nefas ruit: in ludibria versus
 Religionis honor: scisso velamine luget
 Cum Pietate Fides: terras Pax alma reliquit.
- 180 Omnes, tartareis quas impia turba, saphorum,
 Contemptrix Superum et saeculi omnituentis origo,
 Sedibus odurit, pestes bacchantur in orbe.
 His caecas acti in furias ferrumque rebelles
 Consurgunt populi; supremos inter et imos
 185 Ira venit media et non enarrabilis aestus.
 In fratrem arma movet frater: non fabula, sed res
 Nunc agit Oediponidas; nunc omnia cedunt
 In pejus, nullumque capit vesania finem.
 Tot scelerum facies, ac tot praesagia quondam
- 190 Vix fore crediderim summae praenuncia cladis,
 Quam demum feret una dies, quum maxima mundi
 Machina lustrali data praeda cremabitur igni.
- Quis lenire Deum culpis extrema minantem
 Occupet? Aut quis opem saeclo properare ruenti?
 195 Ac velut Aegnei campis invectus apertis.
 Quum vada misceri et cautes albescere longe
 Spumantes, ea signa videt prodentia nautis
 Fulminibus gravidam et ventorum turbine noctem,
 Tollit ad astra manus, votisque paciscitur aether
- 200 Ne ruat iratus, neu puppes hauriat unda:
 Sic trepidi rerum Superos, praecque omnibus unum
 Te cui majores, revocati a limine leti,

- Festam voverunt pompam, annua sacra, diemque,
 Nosque hos nunc, olim et semper reddemus honores,
 205 Te, Pater, auxilio per vota precesque vocamus.
 Ne renuas placare Deum: placabilis aurem
 Is tibi praebebit, pro cuius honore tyrannos
 Sprevisisti, ac laetus poenas mortemque tulisti.
 Quo tamen optatum magis impetrabile fiat,
 210 En, age, divinae radios ante omnia lucis
 Nobis, Sancte, roga, coecae quae mentibus umbras
 Discutiat, causamque mali dans noscere culpas
 Pectora succendat priscoe virtutis amore.
 Sancte, fave, nostroque bonus succurre labori.
 215 In morbos eadem tibi, et impia in arma potestas.
 Sat famis et febrium, sat belli sensimus iras.
 Hac gemuisse tenus liceat. Se rursus in orcum
 Praecipitent, superosque levant furialia monstra.
 Mille adamantei vectes, centum aerea claudant
 220 Ostia; et ore fremant, rabidisque exercita rixis
 Mutua se laniant, pugnamque in saecula ducant.
 Huc ramum interea semper frondentis olivae
 Pax referat, tendensque aequato examine lances
 Iustitia occurrat Paci, et simul oscula jungant.
 225 Jamque ambas pariter, reserato limine caeli
 Devocat, omnigenis dum certa piacula noxis,
 Seque Deo medium et miseris mortalibus offert
 Gregorius, Latii ille parens communis et Orbis;
 Flet tenditque manus, natosque in foedera poscit.
 230 Pro populis reges, populos pro regibus orat.
 Ah tanti lacrimae moveant et munera Patris.
 At nos usque tuos, Heros Narbonice, in astra
 Tollemus plausu ac memori pietate triumphos.
 Victor, io; Pacator, io; tu Numinis iram
 235 Mulces; tu mortale genus tutaris; avernae
 Te Furiae tremuere; tibi mors subjecit arcum.
-

Estratto dagli *Opuscoli, Religiosi, Letterari e Morali*
Serie IV, fascicolo 41, Tom. XIV.

